



KEMENTERIAN PEMBANGUNAN
USAHAWAN DAN KOPERASI

96/2025

SIARAN MEDIA

KUSKOP PERKASA TAMU DESA SARAWAK 39 PROJEK SIAP, HAMPIR 1,730 PENIAGA MENDAPAT MANFAAT

KUCHING, 17 Disember – Kementerian Pembangunan Usahawan dan Koperasi (KUSKOP) terus komited memperkukuh ekosistem keusahawanan luar bandar melalui penyediaan infrastruktur perniagaan yang lebih tersusun, selesa dan moden bagi menyokong pertumbuhan ekonomi setempat.

Sejajar dengan aspirasi Kerajaan MADANI untuk merapatkan jurang pembangunan antara bandar dan luar bandar, YBhg. Dato' Sri Khairul Dzaimie bin Daud, Ketua Setiausaha KUSKOP telah mengetuai delegasi kementerian dalam Program Lawatan Pemantauan Program Pembangunan Premis (Tamu Desa) di 10 lokasi di Sarawak bermula 15 Disember 2025 seperti berikut:

- Tamu Desa Pasar Rakyat Beluru
- Tamu Desa Pasar Rakyat Lapok, Marudi
- Pasar Tamu Selangau, Luar Bandar Sibu
- Tamu Desa Pekan Jakar, Sarikei
- Tamu Desa Pusat Penjaja Bintangor
- Tamu Desa Pusat Penjaja Dua Tingkat Bintangor, Maradong dan Julau
- Tamu Desa Gerai Sampun Gerunggan
- Tamu Desa Gerai Kampung Melayu, Kota Samarahan
- Tamu Desa Pusat Penjaja Semarak
- Tamu Desa Pasar Sukma Ria, Kuching

Program Tamu Desa merupakan antara inisiatif utama KUSKOP menaik taraf prasarana perniagaan penjaja dan peniaga di Sabah dan Sarawak, sekali gus menyokong kelestarian usahawan sektor informal dalam merencanakan aktiviti ekonomi komuniti setempat. Penambahbaikan prasarana ini bukan sahaja menyediakan persekitaran perniagaan yang lebih selesa, bersih dan selamat, malah berpotensi menarik lebih ramai pengunjung serta meningkatkan pendapatan para peniaga.

Pelaksanaan Program Pembangunan Premis (Tamu Desa) di Sarawak dijayakan melalui kerjasama erat antara KUSKOP dan Kerajaan Negeri Sarawak, khususnya Kementerian Perdagangan Antarabangsa, Industri dan Pelaburan (MINTRED) serta Kementerian Kesihatan Awam, Perumahan dan Kerajaan Tempatan (MPHLG), yang telah bermula sejak tahun 2024.

Secara keseluruhan, pelaksanaan 39 projek Tamu Desa di Sarawak bagi fasa 1 dan fasa 2 tahun 2024 melibatkan peruntukan hampir RM6.8 juta yang melibatkan sebanyak 16 Pihak Berkuasa Tempatan (PBT). Projek ini telah memberi manfaat kepada hampir 1,730 peniaga tamu.

Bagi pembudayaan program pendigitalan dalam kalangan komuniti penjaja, KUSKOP menerusi Bank Rakyat telah menyediakan platform i-MerchantRAKYAT kepada hampir 400 orang peniaga tamu desa di 10 lokasi berkenaan bagi kemudahan transaksi tanpa tunai yang lebih cekap dan selamat. KUSKOP turut mengagihkan 400 set topi dan apron Tamu Desa kepada peniaga semasa sesi lawatan berkenaan bagi memperkukuh imej serta keseragaman identiti peniaga.

KUSKOP akan terus memperkukuh kolaborasi strategik bersama Kerajaan Negeri dan agensi pelaksana bagi memastikan pembangunan premis Tamu Desa mencapai objektif yang disasarkan khususnya kepada para usahawan mikro dan kecil di Sabah dan Sarawak.

KEMENTERIAN PEMBANGUNAN USAHAWAN DAN KOPERASI
17 DISEMBER 2025